

# Wenyeji wa Mbinguni



## SABATO MCHANA

**Somo la Juma Hili:** *Flp. 3:17–4:23, 1 Kor. 15:42–44, Yn. 14:27, Zab. 119:165, Ayu. 1:21, 1 Tim. 6:7.*

**Fungu la Kukariri:** “Msijisumbue kwa neno lo lote; bali katika kila neno kwa kusali na kuomba, pamoja na kushukuru, haja zenu na zijulikane na Mungu” (*Wafilipi 4:6*).

**S**omo la juma hili linahitimisha kujifunza kwetu waraka kwa Wafilipi na limejaa masomo muhimu na kanuni za maisha ya kila siku. Inaonekana kwamba kanuni nyingi muhimu za kimaadili zilizoongoza maisha ya mtume Paulo zinapatikana katika aya za mwisho za waraka huu. Sawa na mafundisho ya Yesu, ambayo yanalenga utu wa ndani, kile ambacho Paulo anashiriki nasi ni siri za kuishi maisha ya Kikristo yenye furaha.

Hata wakati mambo hayaendi jinsi ambavyo tungependa, hali ambazo hutokea mara nyingi zaidi kuliko ambavyo tungependa, hatupaswi kuwa na wahaka au wasiwasi au kuvunjika moyo. Badala yake, kuna kanuni zitakazotusaidia kupata nguvu za ndani za kukabiliana na changamoto ambazo maisha huleta, hivyo tunaweza kupata amani tulivu na ya kudumu ambayo ni Mungu pekee awezaye kutoa. Mambo ya sasa na yajayo yamo mikononi Mwake, Naye atatupatia kila kitu tunachohitaji.

Jambo muhimu zaidi, hatupaswi kuweka tumaini letu katika mifumo ya serikali ya kidunia, ambayo daima hutuangusha. Kama Wakristo, sisi ni wenyeji wa ufalme wa Mungu wa mbinguni. Wenyeji huo huja pamoja na fadhila, fadhila za kustaajabisha. Na majukumu pia.

*\*Jifunze somo la juma hili kwa maandalizi ya Sabato ya Februari 14.*

## Mifano ya Kuigwa

Sisi sote, wakati mmoja au mwingine, tumepata watu tunaovutiwa nao na tunaotaka kuwaiga. Kwa watoto, ni muhimu sana kuwa na mifano mizuri ya kuigwa. Kwa kufaa, hawa wanapaswa kuwa baba na mama yao. Watakapokua, watapata mifano mingine ya kuigwa, huenda wanaohusiana na kazi waliyochagua au hata katika wasifu ambao wamesoma. Wanaweza pia kujifunza jinsi wahusika mbalimbali wa Biblia walivyokabiliana na changamoto na kuwalinganisha na mambo uzoefu wa maisha yao wenyewe.

Cha kusikitisha, katika vyombo vya habari vya leo, mifano mibaya ya kuigwa ni mingi. Tumejawa na mfululizo wa maudhui ya kuvuta usikivu—visa vinavyoelezea matatizo pujufu na maisha machafu ya watu mashuhuri. Wasomaji wa Paulo huko Filipi, ingawa bila shaka hawakushughulika na mtandao, hata hivyo walikumbana na changamoto kama hizo.

Ukweli ni kwamba, ulimwengu alioishi Paulo ulikuwa wenye upotovu, ufisadi na uovu sana, kama ulivyo wetu leo. Daima kumekuwa na—na daima kutakuwako, angalau hadi mwisho—uovu mwingi wa kutosha. Swali kwetu ni kwamba: Je, tunautikiaje?

**Soma** Wafilipi 3:17–19. Mifano mizuri na mibaya ya kuigwa inaelezewaje katika kifungu hiki? Ni mambo gani muhimu yanatolewa ili kutofautisha kati ya hiyo?

Hatupaswi kutoona upendo wa Paulo kwa wale ambao hakubaliani nao—anawalilia! Ona pia kwamba hawaiti adui zake bali “adui za msalaba wa Kristo” (*Flp.* 3:18). Paulo alitambua kwamba masuala makubwa zaidi yalikuwa hatarini, yaani, jinsi msalaba unavyovunja vizuizi na kutuweka sisi sote katika kiwango sawa, kama wenye dhambi wanaohitaji Mwokozi (*tazama Efe.* 2:11–14).

Pia, jambo lisilopaswa kupuuzwa ni jinsi Paulo anavyowahimiza Wafilipi kuelekeza fikra katika mifano mizuri, si katika mibaya; kuwafuata kwa uangalifu wale ambao mtindo wao wa maisha unafanana sana na wake. Cha kuyutia, Paulo anatumia lugha kama hiyo katika kuwaonya Warumi “waangalieni wale wafanyao fitina na mambo ya kukwaza kinyume cha mafundisho mliyojifunza; mkajiepushe nao” (*Rum.* 16:17). Wadanganyifu huko Rumi wanaelezwa kama wale ambao “hawamtumikii Bwana wetu Kristo, bali matumbo yao wenyewe” (*Rum.* 16:18).

Ingawa, bila shaka, Yesu ndiye mfano pekee mkamilifu, kuna wengine ambao, angalau katika maeneo fulani, wanaweza kuwa mifano mizuri ya kuigwa. Wakati huo huo, ni aina gani ya mfano wa kuigwa unakuwa kwa wengine?



## “Simameni Imara Katika Bwana”

**Soma** Wafilipi 3:20, 21. Paulo anaelezaje waziwazi jinsi “wenyeji” wa Kikristo unavyofanana?

Tofauti na adui za msalaba, “waniao mambo ya duniani” na ambao mungu wao ni tumbo (*Flp. 3:19*), wenyeji wa Kikristo uko mbinguni, na mtawala wetu ni Yesu Kristo Mwenyewe. Ili kukazia hoja hii, Paulo anasisitizia uhitaji wa “mwili wetu wa unyonge” (*Flp. 3:21*), wenye kupatwa na magonjwa, uchakavu na kifo, kubadilishwa upate kufanana na mwili wa Kristo wa ufufuo mtukufu.

Vifungu vifuatavyo vinaelezeaje hali ya kutukuzwa?

• *Ayu. 19:25–27* \_\_\_\_\_

• *Lk. 24:39* \_\_\_\_\_

• *1 Kor. 15:42–44* \_\_\_\_\_

• *1 Kor. 15:50–54* \_\_\_\_\_

• *Kol. 3:4* \_\_\_\_\_

Hatimaye, kwa njia ya Yesu, kifo, “adui wa mwisho,” ataangamizwa (*1 Kor. 15:26*). Hilo ndilo tumaini letu kuu zaidi, ahadi kuu ambayo tumepewa katika Yesu—si tu mwisho wa kifo bali mwili mpya kabisa, yaani “mwili wa utukufu” (*Flp. 3:21*).

Katika kitabu kinachohusu jinsi ya kupata “wokovu” pasipo Mungu, ambacho kilitoa hoja, kipumbavu kiasi, kwamba kushinda hofu ya kifo ni “wokovu,” mwandishi Luc Ferry anakiri kwamba Ukristo “unatuwezesha si tu kushinda hofu ya kifo, lakini pia kushinda kifo chenyewe. Kwa kufanya hivyo kwa kuzingatia utambulisho wa mtu binafsi, badala ya kutokujulikana au usahaulifu, inaonekana kuwa toleo la pekee linalotoa ushindi wa kweli kabisa wa hali binafsi ya kutokufa dhidi ya hali yetu kama wanadamu tunaokufa.”—Luc Ferry, *A Brief History of Thought* (New York: HarperCollins, 2011, toleo la Kindle), uk. 90. Kukiri kwa hakika, toka kwa mkanamungu.

Kwa hiyo, kwa Paulo, wenyeji wetu wa mbinguni unajumuisha ahadi ya ufufuo na uzima wa milele katika maisha mapya kabisa ambayo hatuwezi kuwazia sasa.

Kwa nini ahadi ya uzima wa milele ni muhimu sana kwa wote tunaoamini? Ulimwengu huu unaweza kutoa nini ambacho kinastahili kupoteza kile ambacho Kristo anatupatia?

## Furahini Katika Bwana—Sikuzote

**Soma** Wafilipi 4:4–7. Tunawezaje kupata uzoefu wa “amani ya Mungu”?

Baada ya kugusia, tena, hitaji la umoja (*Flp. 4:1–3*), Paulo anahamia mada nyingine: kufurahi katika Bwana (*Flp. 4:4–7*).

Ni mara ngapi umesisitizwa juu ya vitu ambavyo hatimaye vilitoweka kwa urahisi haraka jinsi vilivyotokea? Kwa sababu nzuri, Yesu alisisitiza tena na tena kwamba hatupaswi kusumbuka (*tazama Mt. 6:25–34, Mt. 10:19*), na Petro anatukumbusha kwamba tunaweza kumtwika Bwana fadhaa au wasiwasi wetu wote, “kwa maana yeye hujishughulisha sana kwa mambo yetu” (*1 Pet. 5:7*). Kwa hakika, matatizo yanayoongezeka ulimwenguni pote yanapaswa kututia moyo kwa matumaini kwamba kuja kwa Bwana kumekaribia (*linganisha Mt. 24:33, Lk. 21:28, Yak. 5:8*).

Dawa ya wasiwasi katika kila jambo, ikijumuisha kila hali, ni kusali sala ya imani (*Flp. 4:6, 7*). Kwa dhahiri, tunapaswa kuamini na kushikilia sala yetu kana kwamba imejibiwa hata kabla ya kuona matokeo yake, kwa sababu tunapaswa kusali “kwa kushukuru.” Pia limeongezwa neno “kuomba” (*Kiyunani, deēsis*), likiashiria nyakati za kikomo na uharaka (*tazama, kwa mfano, Luka 1:13, Flp. 1:19, 1 Tim. 5:5, Yak. 5:16*). Sala zetu bado ni “maombi,” lakini tunaweza kujua maombi yetu yamepokelewa mradi tunaomba “sawasawa na mapenzi yake” (*1 Yoh. 5:14*). Kisha tunaweza kupumzika na kuwa na amani, tukijua kwamba maombi yetu yote yako mikononi mwa Mungu.

**Vifungu** vifuatavyo vinakuzaje uelewa wetu wa amani ya Mungu? Zab. 29:11, Isa. 9:6, Luka 2:14, Yn. 14:27, 1 Kor. 14:33.

Amani ya Mungu ni kitu ambacho ulimwengu kamwe hauwezi kutoa, kwa sababu amani ya Mungu inatokana na uhakikisho kwamba tuna kipawa cha uzima wa milele kwa njia ya Yesu Mwokozi wetu (*Rum. 5:1, Rum. 6:23*). Amani hii inaathiri kila nyanja ya maisha na “inapita akili zote” (*Flp. 4:7*). Haiwezi kueleweka kwa akili peke yake, kama neno la Kiyunani *nous* (akili) lililotumiwa hapa linavyoonesha.

**Unawezaje kumwelezea mtu maana ya kupata uzoefu wa “amani ya Mungu”?**



## Yatafakarini Haya . . .

Amani ipitayo akili pia “itawahifadhi mioyo yenu na nia zenu katika Kristo Yesu” (*Flp. 4:7*). Uzima wetu wa ndani unahitaji ulinzi. Cha ajabu, Wafilipi 4:7 inatumia sitiari ya kijeshi kuhusiana na amani ya Mungu. Kitenzi cha Kiyunani (*phroureō*) kinatumika kuelezea kikosi cha askari wanaolinda mji dhidi ya uvamizi (*2 Kor. 11:32; linganisha Mdo. 9:24*).

Kipengele kingine muhimu sana cha amani ya ndani kinajumuisha kuishi kwa kupatana na mapenzi ya Mungu. “Wana amani nyingi waipendao sheria yako, Wala hawana la kuwakwaza” (*Zab. 119:165*).

**Soma** Wafilipi 4:8, 9. Ni mambo gani mahususi yanasisitizwa?

Paulo anatoa utangulizi wa Wafilipi 4:8, 9 kwa “hatimaye” na orodha ya sifa sita, ikifuatiwa na muhtasari wake mfupi na kutia shime kuiga mfano wa Paulo. Himizo hili la kuhitimisha linalohusina na tamaduni mbalimbali linapatana vyema na mazingira ya Wayunani na Warumi ya Filipi, pamoja na msisitizo wake mara mbili juu ya sifa njema na mfano. Hata hivyo, jambo la kuvutia ni kwamba, mkazo umewekwa juu ya sifa njema za kibiblia, ambao ni dhahiri kabisa kutokana na Paulo kuacha zile sifa kuu nne za Kiyunani (busara, haki, kiasi na ujasiri).

1. *Kweli*—si kwa bahati, kwamba orodha inaanza na sifa kuu ya kibiblia ya kweli, ambayo Yesu (“Amin, nawaambia. . .”) na Agano Jipya lote wanasisitiza mara kwa mara (*tazama, kwa mfano, Mdo. 26:25, Rum. 1:18, 1 Kor. 13:6, 2 Kor. 4:2, Efe 4:15, 1 Tim. 3:15, Yak. 1:18, 1 Pet. 1:22, 1 Yoh. 2:21*).
2. *Staha*—neni la Kiyunani linarejelea sifa ya mtu binafsi (*linganisha matumizi yake mengine katika 1 Tim. 3:8, 11; Tito 2:2, ambapo limetafsiriwa kama “wastahivu”*).
3. *Haki*—sifa hii inafasiliwa na tabia ya Mungu ya haki (*linganisha matumizi yake katika Flp. 1:7*).
4. *Safi*—mawazo na matendo vinavyotiririka kutoka katika haki ya Mungu inayohesabia haki inayopokelewa kwa imani (*tazama 1 Yoh. 3:3*).
5. *Kupendeza*—uzuri wa kisanaa, unaoonekana sana katika uumbaji wa Mungu.
6. *Sifa njema*—“yo yote yenye sifa njema; ukiwapo wema wo wote, ikiwapo sifa nzuri yo yote.”

Paulo anatoa sifa mbili zaidi, ili maana ya kipagani isiye ikawekwa kwa mojawapo ya sifa hizi: “ukiwapo wema wo wote, ikiwapo sifa nzuri yo yote” (*Flp. 4:8*), tunapaswa kuzitafakari sifa hizi njema za mbinguni. Kisha, ili kuondoa mashaka yote na kuelewa vibaya kunakoweza kutokea, Paulo anatutaka tutende kile tulichojifunza, kupokea, kusikia, na kuona kutokana na mfano wake mwenyewe (*Flp. 4:9*).

## Mambo Muhimu kwa Ajili ya Kuridhika

**Soma** Wafilipi 4:10–13, 19. Ni mambo gani muhimu ambayo Paulo anafunua kwa ajili ya maisha ya kuridhika, yenye furaha?

Wakati hali mbaya zaidi zinapotokea (njaa, ugonjwa, jeraha, hasara), mtu huanza kutafakari juu ya mambo ambayo kwa kweli ni muhimu na kutafakari baraka ambazo kwa kawaida huchukuliwa kuwa za kawaida. “Tunapodhiliwa” (Flp. 4:12), “tukiwa na uhitaji” (NIV), au kubakia “karibu bila kitu” (NLT) ndipo imani inapofanya iwezekane kushinda hali ngumu.

Kinyume chake, tunapoishi “kwa kufanikiwa,” tunapaswa kutambua daima kwamba mafanikio hayo yanaweza kutoweka mara moja (*tazama Mithali 23:5*). Kama vile Ayubu na Paulo wanavyotukumbusha, hatukuja na kitu duniani tulipozaliwa, na hatutakwenda kaburini na kitu chochote (*Ayu. 1:21, 1 Tim. 6:7*). Ona ahadi zifuatazo za Biblia:

- Zaburi 23:1—“Bwana ndiye mchungaji wangu, sitapungukiwa na kitu.”
- Mathayo 6:32—“Baba yenu wa mbinguni anajua ya kuwa mnahitaji hayo yote.”
- 1 Petro 5:7—“Huku mkimtwika yeye fadhaa zenu zote, kwa maana yeye hujishughulisha sana kwa mambo yenu.”
- Wafilipi 4:19—“Na Mungu wangu atawajazeni kila mnachokihitaji kwa kadiri ya utajiri wake, katika utukufu, ndani ya Kristo Yesu.”

Na, jambo la ajabu kuliko yote: “Nayaweza mambo yote katika yeye anitiaye nguvu” (Flp. 4:13). Labda hakuna hata mmoja wetu anayeweza kufahamu kikamili kile “mambo yote” yanachojumuisha. Kwa hakika, kama ilivyo kwa ombi lolote la msaada na nguvu za Mungu, ni lazima tuombe kwa kupatana na mapenzi Yake. Lakini mara nyingi, hata hatuombi mambo tunayojua yanapatana na mapenzi Yake. Ndiyo maana Yakobo 4:2 inasema, “Hamna kitu, kwa kuwa hamwombi.”

Hapa kuna baadhi ya mambo tunayoweza kuomba kwa uhakika kwa sababu tunajua yanapatana na mapenzi ya Mungu:

- Wokovu kwa mpendwa au rafiki (1 Tim. 2:3, 4)
- Ujasiri wa kushiriki imani yetu (Ufu. 22:17)
- Msamaha tunapoungama na kuacha dhambi (1 Yoh. 1:9)
- Nguvu za kutii amri za Mungu (Ebr. 13:20, 21)
- Kuwapenda wale wanaotuchukia na kututendea vibaya (Mt. 5:44)
- Hekima kwa ajili ya hali zenye changamoto (Yak. 1:5)
- Kuelewa ukweli katika Neno la Mungu (Yn. 8:32)

**Unashughulikaje na mambo uliyoyaomba ambayo bado hayajatumia, au yumkini yanaweza yasitimie?**



**Jifunze Zaidi:** “Wale tu ambao wanapokea neema mpya siku zote, watakuwa na nguvu inayolingana na hitaji lao la kila siku na uwezo wao wa kutumia uweza huo. Badala ya kutazamia wakati ujao ambapo, kupitia majaliwa ya pekee ya nguvu za kiroho, watafanywa kufaa kimuujiza kwa ajili ya kuongoa roho, wanajitoa kila siku kwa Mungu, ili awafanye kuwa vyombo vifaavyo kwa matumizi Yake. Kila siku wanatumia vizuri fursa za huduma wanazoweza kupata. Kila siku wanamshuhudia Bwana popote walipo, iwe katika mazingira fulani duni ya kazi nyumbani, au eneo la hadhara wanalofaa kutumika.

“Kwa mtendakazi aliyejiweka wakfu kuna faraja ya ajabu katika kujua kwamba hata Kristo wakati wa maisha Yake duniani alimtafuta Baba Yake kila siku kwa ajili ya kupata neema mpya iliyohitajika; na kutokana na ushirika huu na Mungu alitoka ili kuwaimarisha na kuwabariki wengine. . . .

“Kila mtendakazi anayefuata mfano wa Kristo ataandaliwa kupokea na kutumia nguvu ambazo Mungu ameahidi kwa kanisa Lake kwa ajili ya kukomaza mavuno ya nchi.”—Ellen G. White, *God's Amazing Grace*, uk. 117.

“Mungu anajua mahitaji yetu, na ameyatimiza. Bwana ana hazina ya mahitaji kwa ajili ya watoto Wake, na anaweza kuwapa kile wanachohitaji kwa hali zote. Basi kwa nini hatumtumaini? Amewapa watoto Wake ahadi za thamani kwa sharti la utii wa kweli kwa sheria Zake. Hakuna mzigo asioweza kuondoa, hakuna giza asiloweza kufukuza, hakuna udhaifu asioweza kubadili kuwa nguvu, hakuna hofu asiyoweza kutuliza, hakuna tamaa ya kitu bora asiyoweza kuelekeza na kuthibitisha.

“Hatupaswi kujitazama wenyewe, kadiri tunavyotafakari zaidi mapungufu yetu wenyewe, ndivyo tutakavyopungukiwa na nguvu za kuzishinda.”—Ellen G. White, *That I May Know Him*, uk. 224.

## Maswali ya Kujadili:

❶ Fikiria baadhi ya matukio yako ya kufurahisha zaidi ya maombi yaliyojibiwa. Yamekusaidiaje kupata uzoefu wa amani ya Mungu inayopita akili? Vipi kuhusu maombi yale ambayo hayajajibiwa? Bado unawezaje kupata amani iliyoahidiwa?

❷ Katika muktadha wa Wafilipi 4:8, unatumia muda wako kufikiria nini? Kile unachokifikiri kinaimarisha imani yako na kutembea na Bwana vizuri kiasi gani?

❸ Jadili nukuu ya mwisho hapo juu. Nini maana ya kauli “Kadiri tunavyotafakari zaidi mapungufu yetu wenyewe, ndivyo tutakavyopungukiwa na nguvu za kuyashinda”? Jambo muhimu ni nini, basi, ili kushinda?